

Na osnovu člana 8. i člana 13. Zakona o principima lokalne samouprave u Federaciji BiH ("Službene novine FBiH", broj: 49/06 i 51/09), člana 12. i 21. Zakona o lokalnoj samoupravi Unsko-sanskog kantona ("Službeni glasnik USK-a", broj: 8/11), člana 18. Zakona o unutrašnjoj trgovini ("Službene novine FBiH", broj: 87/24), člana 11. stav 2. Zakona o ugostiteljskoj djelatnosti ("Službene novine FBiH", broj: 32/09), Zakona o turističkoj djelatnosti ("Službene novine FBiH", broj: 32/09), člana 34. Zakona o obrtu i srodnim djelatnostima u FBiH ("Službene novine FBiH", broj: 75/21) i člana 24. Statuta općine Sanski Most ("Službeni glasnik općine Sanski Most", broj: 4/08, 5/08,5/09, 2/10, 9/11), Općinsko vijeće općine Sanski Most na 6. sjednici, održanoj dana 26.03.2025. godine, donijelo je

ODLUKU

o utvrđivanju radnog vremena u ugostiteljskoj i turističkoj djelatnosti, djelatnosti obrta i srodnih djelatnosti, trgovinskoj djelatnosti, zabavnih igara i igara na sreću na području općine Sanski Most

I-OPĆE ODREDBE

Član 1.

Ovom Odlukom utvrđuje se radno vrijeme i raspored radnog vremena u ugostiteljskoj i turističkoj djelatnosti, djelatnosti obrta i srodnih djelatnosti, trgovinskoj djelatnosti, zabavnih igara i igara na sreću.

Član 2.

Pravna i fizička lica koja obavljaju djelatnosti navedene u članu 1. ove Odluke (osim poljoprivredne djelatnosti), dužni su da donesu Odluku o rasporedu početka i završetka radnog vremena, odmoru u toku radnog vremena i neradnim danima u toku sedmice u skladu sa Zakonom, ovom Odlukom i drugim propisima koji regulišu ovu oblast.

Član 3.

Pravna i fizička lica koja obavljaju djelatnost iz člana 1. ove Odluke dužna su:

- istaknuti obavijest o radnom vremenu na vidnom mjestu na ulazu u poslovne prostorije,
- pridržavati se istaknutog rasporeda radnog vremena, a ako ne rade iz opravdanih razloga moraju istaknuti obavještenje na ulazu u poslovne prostorije.

Član 4.

Radno vrijeme objekata u kojima se obavljaju djelatnosti iz člana 1. ove Odluke raspoređuje se na ljetni i zimski vremenski period.

-Ljetni vremenski period traje od 01.aprila - 30.septembra,

-Zimski vremenski period traje od 01.oktobra tekuće godine do 31.marta naredne godine.

II RADNO VRIJEME UGOSTITELJSKE I TURISTIČKE DJELATNOSTI

Član 5.

Ugostiteljskim i turističkim objektima, u smislu ove Odluke, smatraju se svi ugostiteljski objekti koji su registrirani za pružanje ugostiteljskih usluga, u skladu sa Zakonom o ugostiteljskoj djelatnosti ("Službene novine FBiH", broj: 32/09), Zakonom o turističkoj djelatnosti ("Službene novine FBiH", broj: 32/09) i Pravilnikom o razvrstavanju i minimalnim uvjetima ugostiteljskih objekata iz skupina "Restorani", "Barovi", "Catering objekti" i "Objekti jednostavnih usluga" ("Službene novine FBiH", broj: 40/10).

Član 6.

(1) Radno vrijeme ugostiteljskih objekata određuje se:

-u zimskom periodu

-od 06,00 do 24,00 sata – radnim danima i nedjeljom,

-od 06,00 do 01,00 sata – vikendom (petak i subota),

-u ljetnom periodu

-od 06,00 do 01,00 sata – radnim danima i nedjeljom,

-od 06,00 do 02,00 sata – vikendom (petak i subota).

(2) Izuzetak od odredbi stava 1. ovog člana je period od 01.07. – 31.08., kada se radno vrijeme ugostiteljskih objekata utvrđuje svakim danom od 06,00 do 02,00 sata.

Član 7.

(1) Radno vrijeme ugostiteljskih objekata iz skupine barovi (noćni klub, noćni bar, disko bar i disko klub), koji u skladu sa važećim propisima, u pravilu rade noću određuje se od 19,00 sati tekućeg dana do 03,00 sata narednog dana.

(2) Izuzetak od odredbi iz stava 1. ovog člana je period od 01.07. – 31.08., kada se radno vrijeme utvrđuje svakim danom od 19,00 do 04,00 sata.

Član 8.

Izuzetak od radnog vremena ugostiteljskih objekata, utvrđenih u članu 6. i 7. ove Odluke, su ugostiteljski objekti, bez obzira na vrstu, koji se nalaze u stambeno - poslovnim objektima kolektivnog stanovanja (osim objekata koji se nalaze u zoni zabrane saobraćaja-korzo), za koje se utvrđuje radno vrijeme:

-od 07,00 do 22,00 sata - u zimskom periodu,

-od 07,00 do 24,00 sata - u ljetnom periodu.

Član 9.

U vrijeme državnih i vjerskih praznika, kao i organizovanja svečanosti i zabave (maturalna zabava, svadba, jubilarna proslava, kulturni program), radno vrijeme ugostiteljskih objekata može trajati duže od propisanog, a najduže do 03,00 sata, uz prethodno pribavljeno odobrenje Službe za razvoj, poduzetništvo i resurse.

Član 10.

Za vrijeme održavanja kulturnih, sportskih ili sličnih manifestacija, koje svojim značajem predstavljaju unaprijeđenje turističke ponude općine, radno vrijeme ugostiteljskih objekata u urbanom dijelu grada i zoni njihovog održavanja, može se produžiti za vrijeme trajanja tih manifestacija, najduže do 03,00 sata, a po zahtjevu organizatora manifestacije, Turističke zajednice ili Obrtničke komore, o čemu rješenje donosi Služba za razvoj, poduzetništvo i resurse.

Član 11.

Prilikom donošenja rješenja o utvrđivanju produženog radnog vremena Služba za razvoj, poduzetništvo i resurse, dužna je da se pridržava slijedećih kriterija:

a) da se poslovni prostor ne nalazi u stambeno-poslovnoj zgradi kolektivnog stanovanja (izuzev ukoliko svojim radom ne rušava javni red i mir, pridržava se propisanog radnog vremena i ima pribavljenju saglasnost 51% stanara koji žive u stanovima u zgradi kolektivnog stanovanja, koja uključuje i obaveznu saglasnost stanara čiji je stan neposredno uz ili iznad objekta, a potpisana je od strane kućnog savjeta i ovjerena kod nadležnog organa) ili u blizini zdravstvene ustanove za smještaj pacijenata;

b) da nije pravosnažno kažnjavan za prekršaj prekoračenja radnog vremena i za narušavanje javnog reda i mira u objektu za koji se traži produženo radno vrijeme, što dokazuje potvrdom /uvjerenjem nadležnog organa.

Član 12.

Za dobijanje odobrenja za produženje radnog vremena, ugostitelj je dužan:

- podnijeti zahtjev najkasnije 3 radna dana prije dana državnog i vjerskog praznika ili organizovanja svečanosti, odnosno održavanja manifestacije,
- dostaviti dokaz o razlozima produženja radnog vremena kada su u pitanju svečanosti, zabave i manifestacije /ugovor o pružanju ugostiteljskih usluga, odnosno ugovor o zakupu ugostiteljskog objekta/,
- dostaviti potvrdu/uvjerenje iz člana 11.stav 1.tačka b) ove Odluke,
- ukoliko se radi o poslovnom prostoru u stambeno-poslovnoj zgradi kolektivnog stanovanja, dostaviti saglasnost propisanu članom 11.stav 1.tačka a) ove Odluke;
- te izvršiti uplatu takse za izdavanje rješenja o produženju radnog vremena.

Član 13.

(1) U svim ugostiteljskim objektima, bez obzira na dužinu radnog vremena, nije dozvoljeno izvođenje muzike uživo, kao ni emitovanje muzike preko muzičkih uređaja u vremenu od 23,00 do 03,00 sati, ukoliko ima čujnost izvan zatvorenog dijela objekta u kojem se izvodi, odnosno emituje.

(2) Ugostiteljski objekti: bar, noćni bar, disko bar i disko klub, ne mogu obavljati djelatnost izvan zatvorenog prostora, ako na bilo koji način narušavaju javni red i mir.

(3) U svim ugostiteljskim objektima zabranjeno je izvođenje ili emitovanje muzike na dan 11.07. svake godine.

Član 14.

Radno vrijeme objekata koji pružaju usluge noćenja (radno vrijeme prijemnog hla-recepcije) određuje se od 00 do 24 sata.

Član 15.

(1) Ugostiteljske usluge koje se povremeno pružaju izvan ugostiteljskih objekata /na sajmovima, vašarima i sl./, mogu se pružati u okviru radnog vremena tih manifestacija.

(2) Radno vrijeme ugostitelja u objektima u kojima se obavlja neka druga djelatnost/kulturna, obrazovna, sportska, trgovačka i sl./, utvrđuje se u skladu sa radnim vremenom tog objekta, ali ne dužim od radnog vremena utvrđenog ovom Odlukom.

Član 16.

U ugostiteljskim objektima koji pružaju usluge ishrane i pića, "vrijeme tolerancije", odnosno vrijeme konzumacije usluge pružene pri kraju radnog vremena propisanog ovom Odlukom, iznosi 30 minuta, nakon čega objekat mora biti ispražnjen.

Član 17.

Radno vrijeme putničkih agencija i njihovih poslovnih jedinica, koje imaju registriranu mijenjačku djelatnost ili prodaju voznih karata, određuje se od 08,00 do 22,00 sata.

II RADNO VRIJEME TRGOVINSKE DJELATNOSTI

Član 18.

(1) Trgovinska djelatnost je privredna djelatnost kupovine i prodaje robe i pružanje trgovačkih usluga na tržištu, u svrhu ostvarivanja dobiti ili drugog ekonomskog učinka u prodajnom objektu zatvorenog ili otvorenog tipa.

(2) Prodajni objekat je prostor koji čini jedinstvenu, funkcionalnu i tehničko-tehnološku cjelinu, trajnog ili privremenog karaktera, zatvorenog ili otvorenog tipa, opremljen na propisani način, koji je namijenjen ili može biti namijenjen za obavljanje prometa.

Član 19.

Radno vrijeme prodajnih objekata određuje trgovac u periodu od ponedjeljka do subote, u ukupnom trajanju do 90 sati sedmično, a koje trgovac samostalno raspoređuje.

Član 20.

Prodajni objekti zatvoreni su nedjeljom, osim cvjećara, pekara, suvenirnica i objekata tradicionalnih i starih obrta, kao i prodajnih objekata koji se nalaze unutar ili su sastavni dio cjeline: željezničkih i autobusnih stanica i aerodroma, benzinskih pumpi, bolnica, hotela, prostora kulturnih i vjerskih objekata, muzeja i parkova prirode, groblja i specijaliziranih prodavnica vezanih za prodaju na grobljima, otkup primarnih poljoprivrednih proizvoda, prodaju vlastitih poljoprivrednih proizvoda na štandovima, stolovima i u boksovima na tržnicama na malo, prodaju vlastitih poljoprivrednih proizvoda na štandovima, stolovima i u boksovima izvan tržnica na malo, prigodnu prodaju organizovanu u sklopu sajmova, priredbi i izložbi, prodaju putem elektronskih prodavnica, prodaju putem automata, prodaju u proizvodnim objektima porodičnih poljoprivrednih gazdinstava.

Član 21.

Prodajni objekti, osim objekata navedenih u članu 20. zatvoreni su i u dane praznika.

Član 22.

Na radno vrijeme trgovinske djelatnosti koje nije precizirano ovom Odlukom primjenjuje se Zakon o unutrašnjoj trgovini ("Službene novine FBiH", broj: 87/24).

III RADNO VRIJEME OBRITNIČKIH I SRODNIH DJELATNOSTI

Član 23.

Obrtničkom i srodnom djelatnošću u smislu ove Odluke, smatraju se djelatnosti utvrđene Zakonom o obrtu i srodnim djelatnostima u FBiH ("Službene novine FBiH", broj: 75/21), Pravilnikom o popisu obrta ("Službene novine FBiH", broj: 42/22), Uredbom o zaštiti tradicionalnih i starih zanata ("Službene novine FBiH", broj: 28/22), Pravilnikom o djelatnostima koje se mogu obavljati kao domaća radinost ("Službene novine FBiH", broj: 24/23), Pravilnikom o djelatnostima koje se mogu obavljati u stambenim prostorijama i izvan poslovnih i stambenih prostorija ("Službene novine FBiH", broj: 103/22).

Član 24.

(1) Radno vrijeme obrta i srodnih djelatnosti određuje se svakim radnim danom:

- u vremenu od 07,00 do 22,00 sata, u zimskom periodu,
- u vremenu od 07,00 do 23,00 sata, u ljetnom periodu,
- osim u periodu od 01.07. do 31.08., kada se radno vrijeme utvrđuje od 07,00 do 24,00 sata.

(2) U okviru radnog vremena utvrđenim ovim članom, vlasnik obrta / srodne djelatnosti može slobodno organizovati svoje poslovanje u jednokratnom ili dvokratnom radnom vremenu.

(3) Izuzetak od odredbi stava 1.ovog člana, čine **pekare - proizvodni dio**, za koje se utvrđuje radno vrijeme u trajanju od 00 do 24 sata, radnim danom i nedjeljom, dok se za **pekare - prodajni dio** utvrđuje slijedeće radno vrijeme:

- u zimskom periodu
 - od 06,00 do 24,00 sata – radnim danima i nedjeljom,
 - od 06,00 do 01,00 sata – vikendom (petak i subota),
- u ljetnom periodu
 - od 06,00 do 01,00 sata – radnim danima i nedjeljom,
 - od 06,00 do 02,00 sata – vikendom (petak i subota).
- osim u periodu od 01.07. do 31.08., kada se radno vrijeme pekare – prodajni dio utvrđuje svakim danom od 06,00 do 02,00 sata.

(4) Obrtničke/srodne djelatnosti zatvorene su nedjeljom.

(5) Na dan državnog i vjerskog praznika, vlasnici obrta/srodne djelatnosti ne rade, osim pekara.

(6) Odredbe ove Odluke neće se primjenjivati na poljoprivrednu djelatnost kao srodnu djelatnost, zbog same prirode obavljanja iste.

IV RADNO VRIJEME OBJEKATA ZA PRIREĐIVANJE IGARA NA SREĆU I IGARA ZA ZABAVU

Član 25.

- (1) Radno vrijeme objekata u kojima se priređuju igre na sreću (kasino, igre na sreću na automatima u posebnim klubovima) 00,00 do 24,00 sata.
- (2) Radno vrijeme objekata u kojima se priređuje klađenje na razne rezultate i događaje i sl.(kladionica), određuje se radno vrijeme od 07,00 do 23,00 sata.
- (3) Radno vrijeme objekata u kojima se priređuju zabavne igre (igre na računarima, simulatorima, videoautomatima, fliperi, pikado, bilijar i sl), određuje se radno vrijeme od 07,00 do 22,00 sata, u zimskom periodu, a od 07,00 do 23,00 sata, u ljetnom periodu.
- (4) Na dan državnog i vjerskog praznika, objekti u kojima se priređuju igre na sreću i objekti u kojima se priređuju zabavne igre ne rade.

V OGRANIČAVANJE RADNOG VREMENA

Član 26.

- (1) Ako se obavljanjem ugostiteljske, turističke, trgovinske, obrtničke i srodne djelatnosti, te djelatnosti igara na sreću i igara za zabavu uznemiravaju građani koji rade ili stanuju u susjedstvu, nadležna služba može, po prethodno pribavljenom mišljenju Policijske uprave Sanski Most, ograničiti radno vrijeme u objektima obavljanja tih djelatnosti.
- (2) Izuzetno od odredbi prethodnog stava ovog člana, ne može se ograničiti radno vrijeme obrtničke ili druge djelatnosti koje se zbog prirode tehnološkog procesa moraju obavljati neprekidno, danju i noću, ili samo noću.
- (3) Prilikom donošenja rješenja o utvrđivanju kraćeg radnog vremena nadležna služba dužna je da se pridržava sljedećih kriterija:
 - a) da je poslovni prostor u kojem se obavlja navedena djelatnost dio stambeno-poslovne zgrade kolektivnog stanovanja ili se nalazi u naselju za individualno stanovanje, ili je u blizini zdravstvenih, obrazovnih ili vjerskih objekata,
 - b) da je u periodu od godinu dana od dana podnošenja zahtjeva najmanje dva puta kažnjavao, pravosnažnim rješenjem nadležnog suda za prekršaje (ili prekršajnim nalogom), zbog prekoračenja dozvoljenog radnog vremena ili narušavanja javnog reda i mira obavljanjem navedene djelatnosti,
 - c) da se u objektu obavljanja navedenih djelatnosti, ili u njegovoj neposrednoj blizini: učestalo narušava javni red i mir, vrši uživanje i prodaja narkotičkih sredstava i druga društveno negativna ponašanja, o čemu postoje zapisnici i izvještaji nadležnih organa,
 - d) da se u objektu obavljanja navedenih djelatnosti učestalo ne poštuje radno vrijeme o čemu postoje zapisnici ili izvještaji nadležnih organa o povredama ove Odluke.
- (4) Za donošenje rješenja o utvrđivanju kraćeg radnog vremena od propisanog, Službi za razvoj, poduzetništvo i resurse dovoljno je da utvrdi ispunjenost jednog od kriterijuma iz prethodnih tačaka.

Član 27.

Zahtjev za pokretanje postupka za ograničenje radnog vremena iz prethodnog člana ove Odluke na inicijativu građana podnose organi Mjesne zajednice na čijem području se nalazi objekat.

Član 28.

(1) Pravno i fizičko lice, odnosno lice kome je ograničeno radno vrijeme može pokrenuti postupak za ukidanje ograničenja radnog vremena nakon isteka roka od 6 mjeseci od pravosnažnosti rješenja o ograničenju radnog vremena.

(2) Prilikom odlučivanja o zahtjevu iz prethodnog stava ovog člana potrebno je o istom zatražiti mišljenje Policijske stanica Sanski Most i organa Mjesne zajednice.

VI NADZOR

Član 29.

Nadzor nad primjenom ove Odluke vršiće tržišna i ugostiteljsko-turistička inspekcija inspekcija, te Organ javne bezbjednosti.

VII KAZNE NE ODREDBE

Član 30.

(1) Novčanom kaznom od 1.500,00 KM do 3.000,00 KM biće kažnjeno pravno lice, ako se ne pridržava propisanog početka i završetka radnog vremena.

(2) Za prekršaj i stava 1. ovog člana, biće kažnjeno i odgovorno lice u pravnom licu novčanom kaznom u iznosu od 500,00 KM do 1.000,00 KM.

(3) Za prekršaj iz stava 1. ovog člana, biće kažnjeno fizičko lice novčanom kaznom od 1.000,00 KM do 2.000,00 KM .

Član 31.

(1) Novčanom kaznom od 300,00 KM do 1.000,00 KM biće kažnjeno pravno lice, ako na uočljiv način ne istakne početak i završetak radnog vremena.

(2) Za prekršaj iz stava 1. ovog člana, biće kažnjeno i odgovorno lice u pravnom licu novčanom kaznom u iznosu od 200,00 KM do 500,00 KM.

(3) Za prekršaj iz stava 1. ovog člana, biće kažnjeno fizičko lice novčanom kaznom od 100,00 KM do 300,00 KM .

Član 32.

(1) Novčanom kaznom od 1.500,00 KM do 3.000,00 KM biće kažnjeno pravno lice ako izvodi ili emituje muziku suprotno odredbama ove odluke.

(2) Za prekršaj iz stava 1. ovog člana biće kažnjeno i odgovorno lice u pravnom licu, novčanom kaznom u iznosu od 500,00 KM do 1.000,00 KM.

(3) Za prekršaj iz stava 1. ovog člana, biće kažnjeno fizičko lice novčanom kaznom od 1.000,00 KM do 2.000,00 KM.

Član 33.

Ukoliko pravno odnosno fizičko lice počini dva ili više istih prekršaja iz člana 30., 31, ili 32. ove Odluke, Sud može izreći zaštitnu mjeru zabrane obavljanja djelatnosti u trajanju od 30 do 90 dana.

Član 34.

Stupanjem na snagu ove Odluke prestaje da važi Odluka o utvrđivanju radnog vremena u ugostiteljskoj i turističkoj djelatnosti, djelatnosti obrta i srodnih djelatnosti, trgovinskoj djelatnosti, zabavnih igara i igara na sreću na području općine Sanski Most ("Službeni glasnik općine Sanski Most", broj: 04/18, 06/20, 03/21 i 04/23).

Član 35.

Ova Odluka stupa na snagu osmog dana od dana objavljivanja u "Službenom glasniku općine Sanski Most".

Broj: 01-02-88/25

Predsjedavajući Općinskog vijeća

Datum: 27.03.2025. godine

Trožić Amar, s. r.